

Inatsisartut suleriaasianni § 33 naapertorlugu Inatsisartut aalajangiiffigisassaattut siunnersuut imaattoq saqqummiuppara:

2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfiillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qallikanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinissaanut isumaqatigiissusiornissaq isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Anders Olsen, Siumut)

Tunngavilersuut:

Nunatsinni timersornikkut periarfissat siunissaq eqqarsaatigalugu suli ullumikkornit periarfissaasut pitsaanerulernissaat sulissutigisariaqarparput. Sinerissamimi illoqarfinni tamani nunaqarfiillu ilaanni timersortarfinnik peqalersimanerput nuannaarutissaavoq annertoq, taamaalilluni peqqissuunissamik atugaqartitsisinnaanerput kiisalu susassaqartitsisinnaanerput tassuunakkut periarfissiissutigineqarmat.

Nunatsinni timersuutit soqutigineqarneraat aalluneqarneraallu tassaasoq isikkamik arsaanneq tamatta isumaqatigiissutigisinnaavarput, ilami timersornerup iluani kattuffinni ilaasortaqaqarnerpaajusoq aamma ilisimallutigu.

Isumaqaqpunga nunatsinni sioraaqqanik arsaaffeqartarnerup qimakkiartuaarneqarnissaa piffissanngortoq, tassami teknikki nutaaliaasoq atorlugu massakkut arsaaffinnik ivigaasanik qallikkanik sanaartornerit annertuut nunarsuatsinni ingerlanneqarput – aamma nunani avannarlerni eqqaamiorisatsinni. Arsaaffinnut taamaattunut alloriartariaqalernitsinnut soorunami aamma tunngavissaqarluartugut isumaqaqpunga, tassami meerartatta inuusuttortattalu nunat allat arsaaffiittut ittunik atugassaqaqarterutsigit nunarsuatsinni unammiaarnernut qaffasinnerusunut peqataasalernissaat siunissami aqutissiuuttussanngussagatsigu.

Siunnersuuteqartutut isumaqaqpunga arsaaffik ataasiinnaanngitsoq sinerissami pilersinneqartariaqartoq, soorlulumi siunnersuutima qulequtaani tamanna ersersikkiga. Pingaaruteqartutummi isumaqarfigaara sineriassuatsinni ajornanngippat arsaaffiit taamaattut siammarlugit pilersitsissasugut, taamaalilluni innuttaasut timersortartullu nunap immikkoortuini tamani arsaaffinnik taamaattunik atugassaqaqarnissaat periarfissiissutaasariaqarmat.

Kommunit pilersaarutaareersut saniatigut aningaasatigut atuisinnaassusaat killeqarmat Naalakkersuisut kommuneqarfinni tamani ataatsimik ivigaasanik qallikkamik arsaattarfiliornissamut aningaasaliinissaat illersorsinnaalluarpoq. Kommuneqarfiit ataasiakkaat nammineq aalajangissavaat kommuniminni sumi ivigaasanik qallikkamik arsaattarfiliortoqassanersoq.

Ivigaasanik arsaattarfeqarneq Qaqortumi misilittagaqarfigineqarpoq, arsaattarfeerannguarlu taanna anginngikkaluarluni ukiup annersaani pingaartumik meeqqanik inuusuttunullu annertuumik susassaqtitsisuuvoq ilisimavarput. Nuannerluinnartarporlu aasaanerani kujataaniittut meerarpassuit inuusuttuaqqallu katersuullutik arsaaffinnguami tassani unammisaqattaartinneqaraangata, ilaqutaasut ikinngutaasullu amerlasuut malinnaatinneqarlutik nuannisartinneqarlutillu, taamaasilluni inuit akornanni susassareqatigiinneq nuannersoq pilersinneqartarluni.

Taamaattumik qularutigineqassanngilaq ivigaasanik arsaattarfinnik pilersitsisoqaraluarpat innuttaasorpasuarmit nuannaarutigineqarlutillu atorluarneqarumaartut - aamma timersortartuungikkaluit akornanni.

Naggataatigullu arsaattarfiit taakkua sumi sanaartorneqarsinnaanerinit tunngatillugu isumaqarpunga qanimut Kalaallit Nunaanni Arsaattartut Kattuffiat kiisalu kommunit suleqatiginerisigut piffiit sumiissinnaaneri aalajangiunneqarsinnaasut.

Neriuppunga siunnersuut una partiinit ilassilluarneqarluni piumaartoq.

Siunnersuutip aningaasatigut allaffissornikkullu pisortanut kinguneqaatissai

Ineqarnermut Naalakkersuisoqarfiup 2012-imi suliarisimasaani “Kalaallit Nunaanni ivigaasanik arsaattarfiliornissami pilersaarusiordermi assigiissarinnermi malitassiaq”, danskisut allatami, missingiunneqarsimavoq ataatsimik ivigaasanik qallikkamik arsaattarfiliorneq 6,45 mio. kr. akeqassasoq. Tassa sisamanik ivigaasanik qallikkanik arsaattarfiliorneq Nunatta Karsianut ukiut sisamat ingerlanerini minnerpaamik 25,8 mio. kr. aningaasartuutaassaaq.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.